



Mien Fru Dokter weer in een niege Gemeinschaftspraxis mit moderne Tööfrüüm ümtrocken. Op goot twintig Patientenstöhl, wovun jede tweete wegen „Corona“ na de Wannen ümdreihet weer un fantasievolle Biller an de Wannen kunn man de Tööftieden goot överbrücken. Bi 't ümkieken in 'n Ruom füll mien Blick op bannig interessante Deckenlampen!. - Dor hängen wohrhaftig an twee stiefe rot-swatte Drööh öllerhaftige messingsche Lampen-Fassungen för Glööhbeern, de mi noch an Kinnertieden bi uns in Koohstall mit ehr Lummerlicht erinner. -

In mien Tööftiet weer mien Denkoort goot dormit togangen, ruttofinnen, wat sik de Lampenmaker dorbi dacht hett, messingsche Fassungen mit sneewitte Engelflügel as pielflinke Engelgeswader dortostellen. - De

annern Tövers snacken keen Woort miteenanner un harrn woll vun de Engellampen tohöocht an de Deck noch nich recht wat mitkregen. Snutenpullis wegen de Pandemie för de Flapp un gresige Hoosten un deelwies Snööv löten keen Ünnerholung to. - Gode Hölp dorför geev dat dank de unglöövlichen Mööglichkeiten vun de Handklöterkassens (Handys) un dorhen güng ok dat meerste Interesse vun verscheden Lüüd in 'n Tööfruom. - Jümmers een Spooß för mi weer, to sehn, woanns de Een or Anner de süchten makenden Dinger levers in de Buxentasch steken laten schullen.....

Na lange sitten vun goot twee Stünnen Töveree ünner dat nüüdliche „Engelgeswader“ un af un an ok maal dat de „Been-övernanner-slagen“ un gelegentliche umsetzen würr ik opletzt vun Fru Dokter opropen. - Dat opstahn wegen gottslideer inslapan Been füll mi in denn Momang teemlich swoor un erinner mi an mien Bandschieven in 'n Rүүch, wo mi Fru Dokter mit de Würr „de sünd all bannig versleten“ as Tospraak versöoch...

„Bitte setzen Sie sich, - was haben Sie für ein Problem?“ „Tscha, Fru Dokter, smuuster ik un versöoch, vermeentlichen Schalk in de Ogen to genereern. Ik heff dor maal de Fraag, op sik de nödige Ünnersökung bi mi in mien Öller überhaupt noch lohnen deit?“ Fru Dokter keek achter ehr'n Schrievdisch verwunnert hoch: „Aber mein Lieber, wie soll ich das bei Ihrer mir sichtbaren Fitnis verstehen? - Fühlen Sie sich nicht gut?“... „Tscha, weten Se, Fru Dokter, in Tööfruom hängt tohöocht an de Deck an rot-swatte Drööh poor messingsche Lampenfassungen un de, Fru Dokter, sünd utstafeert mit sneewitte Flügel as bi Petrus de Engels to 'n flegen se bruken. Un deswegen mien Fraag, lohnt sik dat noch allens bi mi or mutt man de Engels all as liesen Henwies verstahn?“

Fru Dokter kreeg binah een Lachkrampf na mienen Verteller un meen denn avers, dat düsse Deckenlampen denn Architekten vun denn Nibuu antoreken weern un künstlerisch gestylte Designerideen weern un, dat se keen beten Schuld an düssen Deckensmuck harr.

Wenn ik dat neegstemaal in den Tööfruom bi Fru Dokter to sitten komm, weet ik, mi lött dat söte Engelgeswader weller keen Rooh.....